



Siaran **AKHBAR**

KEMENTERIAN PERTAHANAN MALAYSIA

MOD.100/2/1/2 JLD 5 (42) 11/03

TIMBALAN MENTERI PERTAHANAN SANTUNI VETERAN NEGERI JOHOR

BATU PAHAT - Timbalan Menteri Pertahanan, YB Adly bin Zahari dengan diiringi oleh Timbalan Ketua Setiausaha (Pengurusan) Kementerian Pertahanan, YBrs Dr Mohd Bakhari bin Ismail telah melaksanakan Program Peduli Veteran (PPV) peringkat Negeri Johor hari ini.

Timbalan Menteri Pertahanan telah melaksanakan tiga (3) lawatan kebajikan serta menyantuni veteran-veteran ATM di sekitar daerah Yong Peng dan Batu Pahat. Program ini adalah merupakan salah satu manifestasi Kementerian Pertahanan dalam usaha memberi fokus berterusan kepada veteran dan keluarga tanggungan khususnya dalam aspek kebajikan. Ia juga merupakan usaha pihak kementerian untuk memastikan agenda tersebut sentiasa diberi keutamaan.

PPV yang dilaksanakan merangkumi lawatan kebajikan ke rumah veteran yang memerlukan perhatian dan bantuan. Veteran-veteran tersebut antaranya mengalami sakit kritikal, uzur serta tinggal dalam keadaan daif. Disamping bertanya khabar, Timbalan Menteri Pertahanan turut menyampaikan sumbangan Ramadan dan sumbangan-sumbangan lain yang bersesuaian dengan keperluan veteran yang dikunjungi ketika itu.

Kunjungan 3 buah rumah adalah seperti berikut:

1. Encik Kamarudin bin Kassin, berusia 90 tahun yang menghidap sakit tua, telah uzur dan tidak mampu berjalan. Beliau pernah menerima katil pesakit melalui Bantuan Peralatan Pesakit JHEV dan akan dipertimbangkan untuk menerima Bantuan Sara Hidup (BSH) sebanyak RM300.00 sebulan.
2. Encik Ahmad bin Hassan, berusia 78 tahun yang menghidap sakit buah pinggang dan masalah penglihatan. Veteran telah diluluskan untuk menerima Bantuan Sara Hidup sebanyak RM300.00 setiap bulan.
3. Encik Abdul Kadir bin Ibrahim, berusia 59 tahun yang lumpuh separuh badan dari pinggang ke bawah akibat daripada kecederaan tulang belakang semasa dalam perkhidmatan. Veteran bergerak menggunakan kerusi roda elektrik yang diterima dari Bantuan Peralatan Pesakit JHEV. Veteran merupakan penerima Pencen Hilang Upaya dan Insentif Khas Insurgensi secara bulanan.

Melalui program ini juga, lebih ramai Veteran ATM yang terkesan berjaya disantuni sekaligus memberi peluang Timbalan Menteri Pertahanan bersemuka dan mendengar keluh kesah para veteran secara terus. Pada tahun ini, sebanyak 800 program seumpamanya telah dirancang untuk dilaksanakan di seluruh negara. PPV pada kali ini adalah merupakan siri pertama yang dilaksanakan dalam bulan Ramadan.

Pada sebelah petangnya, Timbalan Menteri Pertahanan juga berkesempatan meluangkan masa menghadiri majlis berbuka puasa bersama 250 orang warga Rejimen Ke-10 Askar Melayu Diraja (RAMD) dan ahli-ahli persatuan veteran setempat di Dewan Serbaguna 10 RAMD. Dalam majlis tersebut turut diadakan tazkirah Ramadan sebelum berbuka puasa dalam usaha menghidupkan keberkatan bulan Ramadan dengan majlis ilmu selain menyahut seruan Perdana Menteri. Seterusnya diadakan penyampaian sumbangan Ramadan kepada veteran dan solat Magrib secara berjemaah.

Hadir sama dalam program ini ialah Panglima Briged Ketujuh Infantri Malaysia (7 Bgd), Brig Jen Mohamad Suria Mohamad Saad, PS1 Urusetia JHEV ATM, Leftenan Kolonel Khairul Azman bin Kormin, Pengarah JHEV Cawangan Johor, Mejar Zulkifly bin Bakhtiar, Pertubuhan Kebajikan Veteran Tidak Berpencen (PEKEBAT), Persatuan Veteran Bekas 13 RAMD (PV 13 RAMD) dan persatuan-persatuan veteran sekitar Johor.

-TAMAT-

“MALAYSIA MADANI”

“BERKHIDMAT UNTUK NEGARA”

“PERTAHANAN NEGARA TANGGUNGJAWAB BERSAMA”

Kementerian Pertahanan Malaysia
31 Mac 2023

